

Tallimangornermi 23. maj 2008-mi TELE Greenland A/S-imi nalinginnaasumik ataatsimeersuarneq

Naalakkersuisunut ilaasortap Kim Kielsen-ip oqalugiaataa

Naalakkersuisut sinnerlugit Siulersuisut siulittaasuata nalunaarutaanut qujavunga. Aammattaaq Naalakkersuisut Tele Greenlandip siulersuisui, qullersaqarfia sulisuilu ukiumi qaangiuttumi sulilluarsimanerat pillugu qutsavigai.

Ussatitoqaq malillugu, allanngoriartorfiusumik anorlertillugu inuit ilaat alanngiffiliortarput, ilaalli anorisaatinik nappaatiterisarlutik. TELE suliffeqarfinnut anorisaatinik sanaartortuarnut, taamaalillutillu allannguinerneq suliffeqarfinnut iluaqutaasumik atuinnissamik paasisimasalinnut assersuutissaalluarpoq.

TELE-p Kalaallit Nunaata aamma Islandip, taamatullu Kalaallit Nunaata Canadallu akornanni immap naqqatigut kabeliliassamut aningaasaliinerata takutippaa, TELE nalunaarasuartaateqarnerup iluani allannguinerneq piimassuseqarluartoq piareersimasorlu. Immap naqqatigut kabeliliinikkut Kalaallit Nunaanni IT-mik nalunaarasuartaatigullu attaveqaatinik atorluaanermik ineriartortitsinerup ingerlaannarnissaa qulakkeerneqassaaq. Imatut oqassaanga; immap naqqatigut kabeliliineq aningaasaliineruvoq TELE-mut aammalu Kalaallit Nunaannut pisariaqartoq.

Nunarsuarmioqatigiit imminnut qanilliartuinnarneranni attaveqaqatigiinnissap pingaaruteqaleriartuinnarnera avaqqunneqarsinnaanngilluinnarpoq. Attaveqaqatigiinnermi telexit, telefaxit sivikitsunnguamillu oqarasuaatikkut oqaluussisarnerit kisimik atorneqarunnaarsimapput. Naamik, siunissami nalunaarasuartaatigut attaveqaqatigiittarnissat pisinnaasanik naammattunik, qaffasissunik pitsaassusilinnik, nassitsisarnermi sukkanerusunik aammalu pilersuinerup qularnaatsuunerata qaffasinnerunissaa pisariaqartussaapput. Immap naqqatigut kabeliliassaq siunissami Kalaallit Nunaata nalunaarasuartaatigut attaveqaateqarneranut pingaaruteqarluinnalersussaavoq. Taamaattumik TELE-p Kalaallit Nunaannut immap naqqatigut kabeliliinissaq ajornarunnaarsimmagu, taamaalillunilu Kalaallit Nunaata ineriartortuarnissaanut tapersiilluni Naalakkersuisuniit iluarisimaarparput.

TELE-mi sanaartugassanut aatsaat taama annertutigisunut aningaasaliinerup saniatigut, TELE-p radiokæde pitsaanerulersinnaasimavaa, bredbåndimik atuisinnaaneq nunaqarfinnut amerliartortunut siaruartersinnaasimavaa aammalu ungasinngitsukkut savaatillit nalunaarasuartaatigut attaveqaatit pitsaanerulissutaat iluaqutigilertussaavaat nuannaarutigilertussaallugillu. TELE-p nunami pissutsit ajornakusooraluartut inoqarfiillu akuttugaluartut tamatigut sullissinerup tunisassiallu pitsaanerulernissaat eqeersimaaffigimmagit tamanna nuannaarutissaasoq Naalakkersuisut isumaqarfigineqarput. Tamanna inuiaqatigiinnut TELE Greenlandip akuuffigisaanut paasisimaarinnilluarnermut atassuteqarluarnermullu takussutissaavoq. Tamassi angusasi pillugit tulluusimaarnissamut pissutissaqarluarpusi.

Allakkeriveqarneq suli ilaatigut teknologimik ineriartortitsineq, e-mailinik homebankingimillu atuinnissamut ajornarunnaarsitsisimasooq pissutigalugu allakkat ikiliartornerannit suli tatineqariartuinnarpoq. Taamaakkaluartoq POST Greenland aammaloorluni angusaqarluarnerminik takutitsivoq. POST Greenlandimi ajornartorsiutit immikkut ittut Naalakkersuisunit eqqumaffigineqarluarput, taamaattumillu POST Greenland suli unammilligassanut pitsaanerpaamik sorsussinaasimammat nuannaarutissaavoq.

Piginnaangorsaalluni sulinerit inuiaqatigiinni sumiluunniit salliutinneqartuarnissaat Naalakkersuisunit pingartinneqarpoq. Tamaattumik TELE Greenlandimi ilinniartitaanerit pisinnaasanillu qaffasaanerit aallunneqarmata Naalakkersuisut iluarisimaarpat. Ilinniartitaaneq ilisimasaqarnerulernerlu nalinginnaasumik suliffeqarfinmmut pingaartumillu sulisunut ataasiakkaat eqqarsaatigalugit pitsaaqutaasussaavoq. Kalaallinik siuttussatut ilinniartitsineq siunissami inuiaqatigiinnut suliffeqarfimmullu annertuumik iluaqutaalersussaavoq.

Nunami namminersuleriartuinnartumi najugaqarpugut, taamaattumillu sullissivitta ingerlatseqatigiiffiutittalu malinnaanissaat pingaaruteqarpoq. Taamaattumik TELE Greenlandip ingerlatseqatigiiffiup suliaani tamaginni kalaalinngorsaani annertusissagaa Naalakkersuisut naatsorsuutigaat.

Nunani issittuni avatangiisit sunnertiasorujussuupput. Tamanna pissutigalugu TELE Greenlandip avatangiisinut sunniutissat sapinngisamik annikinnerpaatinniarlugit atortulersuutinik atortunillu ilusilersunerminnik suleriaasissanillu piareersaasarnerminnik ingerlatsiinnarnissaa Naalakkersuisut pingaartippaat.

Aammaloorlunga periarfissaq manna iluatsillu siulersuisut qullersaqarfillu ukiumi qaangiuttumi sulilluarsimanerannik qutsavigaakka. Tamatumunnga peqatigitillugu qullersaqarfik qinnuigissavara, ingerlatseqatigiiffimmi sulisut ukiumi qaangiuttumi sulilluarsimanerannik qujassutigapuuq.

Taamatut oqaaseqarlunga siulersuisut nalunaarutaat Naalakkersuisut tusaatissatut tigugaat oqaatigissavara.